

28/03/2001

## Pakatan strategik eksploitasi peluang industri pelancongan

KUALA LUMPUR, Selasa - Malaysia akan menggunakan Persidangan Persatuan Pengembaraan Pasifik dan Asia (Pata) 2001 bulan depan, sebagai landasan mempopularkan negara ini sebagai destinasi pelancongan utama rantau ini.

Menteri Kebudayaan, Kesenian dan Pelancongan, Datuk Abdul Kadir Sheikh Fadzir, berkata itu antara enam sasaran utama Malaysia sempena Persidangan Pata yang berlangsung di Pusat Dagangan Dunia Putra (PWTC) selama lima hari bermula 8 hingga 12 April ini.

Katanya, persidangan yang akan dirasmikan Perdana Menteri, Datuk Seri Dr Mahathir Mohamad itu akan digunakan untuk menjana keyakinan pengendali pelancongan supaya mengutamakan Malaysia dalam program pelancongan mereka.

Beliau berkata, usaha akan diadakan bagi membersihkan imej selain menangkis publisiti buruk media asing terhadap negara ini yang secara tidak langsung menjejaskan industri pelancongan.

"Wakil media antarabangsa akan dibawa melawat destinasi menarik di seluruh negara. Kita juga akan dedah dan terangkan situasi sebenar terutama membabitkan kes negatif mengenai negara ini," katanya.

Beliau berkata demikian pada sidang akhbar Forum Pelancongan Apec Kedua dan Persidangan Tahunan Pata ke-50 di kementeriannya, hari ini.

Forum Pelancongan APEC Kedua akan diadakan pada 7 April dan kira-kira 1,800 peserta dari 40 negara dijangka menyertai persidangan Pata sempena sambutan jubli emas persatuan itu.

Di majlis itu, Abdul Kadir menerima sumbangan penajaan daripada sebahagian 61 penaja persidangan Pata.

Abdul Kadir berkata, Malaysia juga akan mewujudkan pakatan strategik dengan delegasi asing bagi mengeksplorasi peluang dalam industri pelancongan selain mempromosikan Malaysia sebagai destinasi penganjuran pameran dan konvensyen yang kompetitif.

"Kita akan mempunyai kemudahan dan infrastruktur pelancongan yang mampu menganjurkan pameran dan konvensyen bertaraf antarabangsa," katanya.

PATA 2001 akan membincangkan perkembangan terkini bidang pelancongan dan kembara dunia serta aplikasi teknologi maklumat dalam sektor itu.

Persidangan yang bertema "Proud Past- Promising Future" akan menampilkan penceramah dari Boeing Commercial; Marriot International, Landor Associates, Time Asia dan The New Internet Computer System Company. Malaysia pernah menjadi tuan rumah persidangan PATA pada 1972 dan 1986.

(END)